

Na osnovu člana 16. stav 4. Zakona o Vladi Zeničko-dobojskog kantona-Prečišćeni tekst ("Službene novine Zeničko-dobojskog kantona", broj: 7/10), na prijedlog Ministarstva za obrazovanje, nauku, kulturu i sport, Vlada Zeničko-dobojskog kantona na 14. sjednici, održanoj dana 11.06.2015. godine, d o n o s i

ZAKLJUČAK

I.

Prihvata se Mišljenje Ministarstva za obrazovanje, nauku, kulturu i sport, doneseno po Inicijativi poslanika Edhema Fejzića, broj: 01-02-12052-1/15., od 08.06.2015. godine, vezanoj za izradu podzakonskog akta koji bi precizno precizirao normu oblačenja u osnovnim i srednjim školama, i čini sastavni dio ovog zaključka.

II.

Zaključak se upućuje u daljnju skupštinsku proceduru.

III.

Zaključak stupa na snagu danom donošenja.

Broj: 02-_____/15.

Datum, 11.06.2015. godine

Z e n i c a

PREMIJER

Miralem Galijašević

DOSTAVLJENO:

1x Ministarstvu za obrazovanje, nauku, kulturu i sport,

1x Stručna služba Skupštine,

1x a/a.

U vezi sa aktom Stručne službe Skupštine Kantona, broj: 01-02-12052/15., od 29.05.2015. godine, vezane za podnesenu Inicijativu poslanika Edhema Fejzića a koja se odnosila na izradu podzakonskog akta koji bi precizno precizirao norma oblačenja u osnovnim i srednjim školama, resorno ministarstvo daje sljedeće:

MIŠLJENJE

Uvažavajući iskrene namjere zastupnika Edhema Fejzića, usmjerene ka adekvatnom postupanju naših škola ka umanjenju materijalno-socijalnih različitosti naših učenika, ovaj organ kantonalne uprave je sa dužnom pažnjom razmotrio podnesenu inicijativu, te o istoj obavio i dodatne, usmene konsultacije sa svim akterima u odgojno-obrazovnom procesu, a koji su tom prilikom izrazili izvjesnu suzdržanost u pogledu donošenja obavezujućih provedbenih akata koji bi se po ovim pitanjima, primjenjivali u našim osnovnim i srednjim školama. Naime, ovakva pitanja bila su i u prethodnim školskim godinama, predmetom dodatnog interesovanja vijeća roditelja i vijeća učenika, ali zbog niza objektivnih i subjektivnih okolnosti, (recesija, budžetska izdavanja, opremljenost samih škola i slično), kao i pratećih pitanja pedagoške prirode, rezultirali su činjenicom da u školama postoji Kodeks ponašanja, kao i određeni općeprihvatljivi etički kodeksi, koji u dovoljnoj mjeri uređuju i pitanja postavljena u predmetnoj inicijativi. Ovdje posebno naglašavamo izvjesne razlike u odnosu ka učenicima osnovnih i učenicima srednjih škola, koje kako zbog razlika u uzrastu, tako i u samom obrazovno-odgojnom konceptu, zakonodavac tretira različito, u smislu same obaveznosti i pripadajućih troškova pohađanja nastave. S tim u vezi smo i ranije zauzeli stajalište da u školama gdje roditelji i učenici, (jedinstveno), zahtijevaju uvođenje školskih uniformi, isto i omogućimo, ali to nikako ne može biti povodom za obavezujuće postupanje svih učenika i njihovih roditelja putem jedinstvenog podzakonskog akta. Dakle, riječ je o uvođenju obaveze za (cca. 56.000, učenika), različite uzrasne i razvojne dobi, tako da bi uvođenje školskih kecelja-uniformi, značilo enormna dodatna povećanja za roditelje i učenike, (posebno kada u porodicama ima više školskih obveznika različitih uzrasta). Tim prije, što trenutne recesijske okolnosti ne omogućavaju nikakva dodatna izdvajanja za ove namjene, niti dodatne poticaje tekstilnoj privredi kako se to navodi u predmetnoj inicijativi. Pored toga, naglašavamo da su prošla vremena jednostranog nametanja bilo kakve uniformnosti školskih kecelja u pogledu njihove boje ili dizajna, te da svaka škola, već ima posebna obilježja, ambleme i slično, a što bi dodatno otežalo donošenje jedinstvenih rješenja, za sve obrazovne ustanove na području Kantona. Pored toga želimo naglasiti i činjenicu da niti u periodima nošenja obaveznih školskih kecelja nisu bile umanjene i tada prisutne socijalne razlike, te da nisu bila riješena i tzv prateća pitanja, (primjerice, vraćanje učenika sa nastave bez kecelje, odlaganje istih u školske ormariće, tekuća higijena-održavanje istih i slično).

Stoga, a imajući u vidu naprijed navedeno činjenično-pravno stanje, mišljenja smo da u ovom aktuelnom društveno-ekonomskom trenutku, nije moguće realizovati podnesenu inicijativu uvaženog zastupnika, na način ili u obimu u kojem je ista i predložena.